

**BERITA ONLINE
KOSMO
TARIKH: 28 SEPTEMBER 2021
(SELASA)**



Adham.

MOSTI mahu jana ekonomi menerusi STI

Oleh MOHD. HUSNI MOHD. NOOR 28 September 2021, 5:11 pm

PUTRAJAYA – Kementerian Sains, Teknologi dan Inovasi (Mosti) komited membantu kerajaan untuk menjana dan memacu semula ekonomi negara menerusi sains, teknologi dan inovasi (STI).

Menterinya, Datuk Seri Dr. Adham Baba berkata, ketika ini, Mosti berada pada landasan yang tepat dalam menjadikan Malaysia sebagai negara berpendapatan dan berteknologi tinggi.

Beliau berkata, hasrat besar itu disokong oleh Dasar Sains, Teknologi dan Inovasi Negara (DSTIN) 2021-2030 serta Rangka Kerja 10-10 Sains, Teknologi dan Inovasi Malaysia (MySTIE) yang dilancarkan pada 8 Disember 2020.

“Gabungan kedua-dua DSTIN dan MySTIE ini akan memastikan kemajuan sains dan teknologi bergerak seiring dengan pertumbuhan ekonomi negara,” katanya menerusi satu kenyataan hari ini.

Katanya, Mosti turut menyambut baik pembentangan Rancangan Malaysia Ke-12 (RMK-12) oleh Perdana Menteri, Dato’ Seri Ismail Sabri Yaakob, semalam.

Adham berkata, strategi-strategi di bawah pemangkin dasar pertama dan kedua dalam RMK-12 itu adalah selari dengan komitmen yang dilaksanakan Mosti ketika ini.

Menurutnya, dasar pemangkin itu antara lain mahu membangunkan bakat masa hadapan serta mempercepat penerimaan dan penggunaan teknologi dan inovasi.

“Ia bertepatan dengan usaha pemulihan negara khususnya menjana semula ekonomi pasca pandemik Covid-19,” katanya. – K! ONLINE